

Na osnovu čl. 4.2 i 4.8. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) i člana 33. Metodologije za izradu tarifa za usluge distribucije električne energije u Brčko Distriktu Bosne i Hercegovine ("Službeni glasnik BiH", br. 89/11 i 90/14), rješavajući po zahtjevu Javnog preduzeća za komunalne djelatnosti "Komunalno Brčko" d.o.o. Brčko, broj 03-39-AdminE-004 od 8. novembra 2019. godine, na sjednici Državne regulatorne komisije za električnu energiju, održanoj 11. marta 2020. godine, donijeta je

## ODLUKA

### O TARIFAMA ZA USLUGE DISTRIBUCIJE ELEKTRIČNE ENERGIJE U BRČKO DISTRIKTU BOSNE I HERCEGOVINE

#### Član 1.

##### (Predmet)

Ovom Odlukom utvrđuju se tarife, odnosno cijene distribucije električne energije izražene kroz tarifne stavove, koji služe za obračun i naplatu usluga distribucije električne energije od kupaca električne energije u Brčko Distriktu Bosne i Hercegovine.

#### Član 2.

##### (Potrebni godišnji prihod)

Javnom preduzeću za komunalne djelatnosti "Komunalno Brčko" d.o.o. Brčko (u daljnjem tekstu: Komunalno Brčko) za djelatnost distribucije električne energije određuje se potrebni godišnji prihod u iznosu od 13.530.634 KM.

#### Član 3.

##### (Tarifni stavovi)

Tarifni stavovi za usluge distribucije električne energije za kupce u Brčko Distriktu Bosne i Hercegovine su sljedeći:

Opis			Tarifni stavovi za usluge distribucije električne energije*					
			Obračunska snaga		Aktivna električna energija		Prekomjerno preuzeta reaktivna električna energija	
Kategorije potrošnje i grupe kupaca		Jedinica mjere	KM/kW/mjesec		feninga/kWh		feninga/kvarh	
Naziv kategorije	Naziv grupe	Sezona	VS (zima)	NS (ljetno)	VS (zima)	NS (ljetno)	VS (zima)	NS (ljetno)
		Doba dana						
35 kV		VT	2,69		0,73		2,40	
		MT			0,37			
10 kV		VT	6,81		1,57		3,02	
		MT			0,78			
0,4 kV – javna rasvjeta		ST			6,16			
0,4 kV – ostala potrošnja	1 TG	VT	11,50		2,22		4,19	
		MT			1,11			
	2 TG	ST	3,41	2,62	4,31	3,31	4,30	3,31
		VT			7,67	5,90		
3 TG	VT	3,41	2,62	3,84	2,95	4,30	3,31	
	MT							
0,4 kV – domaćinstva	1 TG	ST	1,95	1,50	4,18	3,22		
		VT			5,57	4,29		
	MT	2,79			2,14			

\*Tarifni stavovi ne sadrže iznos poreza na dodatu vrijednost.

**Član 4.**  
**(Obračunska snaga)**

Obračunska snaga iznosi 5 kW za tarifne grupe kupaca iz kategorija potrošnje na 0,4 kV kod kojih se obračunska snaga ne utvrđuje mjerenjem (2. i 3. tarifna grupa iz kategorije *ostala potrošnja*, 1. i 2. tarifna grupa iz kategorije *domaćinstva*).

**Član 5.**  
**(Tarifni stavovi prema sezonama i dobu dana)**

- (1) Tarifni stavovi za aktivnu energiju primjenjuju se prema sezoni, i to:
  - a) u višoj sezoni (VS) od 1. oktobra do 31. marta,
  - b) u nižoj sezoni (NS) od 1. aprila do 30. septembra.
- (2) Tarifni stavovi za aktivnu energiju primjenjuju se prema dobu dana, i to:
  - a) veći dnevni tarifni stavovi (VT) od 6 do 22 sata tokom zimskog računanja vremena, odnosno od 7 do 23 sata tokom ljetnog računanja vremena,
  - b) manji dnevni tarifni stavovi (MT) od 22 do 6 sati tokom zimskog računanja vremena, odnosno od 23 do 7 sati tokom ljetnog računanja vremena.
- (3) Izuzetno od stava (2) ovog člana, za kategoriju potrošnje *domaćinstva* tarifni stavovi za aktivnu energiju primjenjuju se prema dobu dana, i to:
  - a) veći dnevni tarifni stavovi (VT) od 7 do 13 sati i od 16 do 22 sata tokom zimskog računanja vremena, odnosno od 8 do 14 sati i od 17 do 23 sata tokom ljetnog računanja vremena,
  - b) manji dnevni tarifni stavovi (MT) od 13 do 16 sati i od 22 do 7 sati tokom zimskog računanja vremena, odnosno od 14 do 17 sati i od 23 do 8 sati tokom ljetnog računanja vremena, te nedjeljom.

**Član 6.**  
**(Obaveza objave tarifnih stavova)**

Komunalno Brčko dužno je na odgovarajući način objaviti tarifne stavove i relevantne odredbe ove Odluke, te ih učiniti dostupnim svim kupcima na području Brčko Distrikta BiH.

**Član 7.**  
**(Završne odredbe)**

- (1) Ova Odluka stupa na snagu danom donošenja, a primjenjuje se od 1. aprila 2020. godine.
- (2) Dispozitiv Odluke objavljuje se u “Službenom glasniku BiH” i službenom glasilu Brčko Distrikta BiH.

**Obrazloženje**

Shodno Odluci o osnivanju javnog preduzeća “Komunalno Brčko” d.o.o. Brčko (“Službeni glasnik Brčko Distrikta BiH”, br. 20/07, 21/07, 24/08 i 33/09), Komunalno Brčko dužno je omogućiti distribuciju električne energije, te vršiti snabdijevanje korisnika sistema i kupaca električnom energijom na svom području djelovanja.

U skladu sa članom 7. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, br. 7/02, 13/03, 76/09 i 1/11, u daljnjem tekstu: Zakon o prijenosu) i članom 107a. Zakona o električnoj energiji (“Službeni glasnik Brčko Distrikta BiH”, br. 36/04, 28/07, 61/10 i 4/13), za obavljanje ovih aktivnosti Komunalno Brčko je bilo dužno pribaviti licencu Državne regulatorne komisije za električnu energiju (u daljnjem tekstu: DERK), a prema uvjetima, kriterijima i procedurama koje odredi DERK.

Komunalno Brčko je vlasnik licence za obavljanje djelatnosti distribucije električne energije na području Brčko Distrikta BiH, registracijski broj 05-28-12-413-28/12, izdate Odlukom DERK-a broj 05-28-12-413-27/12 od 17. januara 2013. godine ("Službeni glasnik BiH", broj 5/13) i licence za obavljanje djelatnosti trgovine i snabdijevanja električnom energijom na teritoriji Bosne i Hercegovine, registracijski broj 05-28-12-223-16/17, izdate Odlukom DERK-a broj 05-28-12-223-16/17 od 11. oktobra 2017. godine ("Službeni glasnik BiH", broj 75/17).

Tarife za usluge proizvodnje, distribucije i snabdijevanja električnom energijom u Brčko Distriktu BiH, saglasno naprijed pomenutim zakonima, regulira i odobrava DERK.

Komunalno Brčko je 8. novembra 2019. godine dopisom broj 04-28-5-391-1/19, uputilo DERK-u Zahtjev za određivanje tarifa za usluge distribucije električne energije i tarifa za snabdijevanje u okviru javne usluge.

Početak tarifnog postupka je uslijedio donošenjem Zaključka DERK-a o pokretanju postupka za određivanje tarifnih stavova za usluge distribucije električne energije i tarifnih stavova za snabdijevanje u okviru univerzalne usluge broj 04-28-5-391-2/19 od 13. novembra 2019. godine.

Tarifni postupak je proveden u skladu sa pravilima DERK-a. Obavijest o pokretanju postupka i saopćenje za javnost izdati su 15. novembra 2019. godine. U postupku nije bilo subjekata zainteresiranih za dobivanje statusa umješaća. Pripremna rasprava održana je 3. decembra 2019. godine u Tuzli, a formalna javna rasprava 11. decembra 2019. godine u Brčkom. Izvještaj voditelja postupka dostavljen je podnosiocu zahtjeva za tarife 27. decembra 2019. godine. Na Izvještaj voditelja postupka Komunalno Brčko uputilo je svoje komentare 9. januara 2020. godine.

Razmatranje podnesenog zahtjeva kroz postupak odobravanja tarifa, u najvećoj mogućoj mjeri mora ispoštovati osnovna načela koja propisuju da će tarife biti pravedne i razumne, ravnopravne, zasnovane na objektivnim kriterijima i opravdanim troškovima i određene na transparentan način.

Poslovanje Kompanije u 2019. godinu obilježila je značajna fluktuacija troška nabavke električne energije, koji predstavlja dominantan trošak sa učešćem od preko 70% u ukupnim troškovima poslovanja sa električnom energijom. Komunalno Brčko je tokom 2019. godine dva puta potpisivalo ugovore o nabavci električne energije sa svojim dobavljačem, a značajne promjene troška nabavke su bile posljedica porasta cijena električne energije na domaćem i regionalnom tržištu. I pored toga, Komunalno Brčko je zadržalo pozitivan poslovni rezultat. Ova regulirana kompanija je 4. oktobra 2019. godine potpisala novi ugovor o nabavci električne energije za 2020. godinu za potrebe konzuma Brčko Distrikta BiH, pri čemu nabavna cijena električne energije iznosi 10,2318 feninga/kWh sa uključenim troškovima po osnovu plaćanja tarife za usluge prijenosa, tarife za rad nezavisnog operatora sistema i tarife za sistemsku uslugu. Aneksom ugovora, ovaj iznos je povećan na iznos od 10,2874 feninga/kWh uvažavajući povećanje tarife za sistemsku uslugu.

U tabeli 1. dati su podaci za djelatnost distribucije električne energije i to odobreni troškovi za 2017. i 2018. godinu, ostvareni troškovi za 2018. godinu, procijenjeni troškovi za 2019. godinu, planirani troškovi za 2020. godinu, te iznos odobrenih troškova za 2020. godinu.

Tabela 1.

<b>Operativni i kapitalni troškovi i rashodi (KM)</b>	<b>2017. Odobreno (KM)</b>	<b>2018. Odobreno (KM)</b>	<b>2018. Ostvareno (KM)</b>	<b>2019. Procjena (KM)</b>	<b>2020. Plan (KM)</b>	<b>Odobreno (KM)</b>
Materijalni troškovi	1.260.000	1.260.000	1.210.058	1.230.000	1.250.000	<b>1.230.000</b>
Troškovi usluga	460.000	460.000	423.433	430.000	450.000	<b>450.000</b>
Troškovi radne snage	4.300.000	4.300.000	4.254.504	4.560.000	4.550.000	<b>4.400.000</b>
Amortizacija	614.248	664.845	697.968	810.000	900.000	<b>857.347</b>
Nematerijalni troškovi	263.000	263.000	319.099	300.000	270.000	<b>263.000</b>
Ostali rashodi	175.000	60.000	58.412	70.000	70.000	<b>65.000</b>
Troškovi kamata i ostali finansijski troškovi	50.000	50.000	180.142	40.000	80.000	<b>80.000</b>
Regulatorna naknada	57.000	61.000	61.000	74.000	74.000	<b>70.000</b>
<b>A - Ukupno troškovi i rashodi</b>	<b>7.179.248</b>	<b>7.118.845</b>	<b>7.204.616</b>	<b>7.514.000</b>	<b>7.644.000</b>	<b>7.415.347</b>
<b>B -Ostali prihodi (donirana sredstva)</b>						<b>59.068</b>
<b>C -Ostali prihodi (komercijalne usluge)</b>						<b>241.237</b>
<b>D -Potreban prihod (A-B-C)</b>	<b>7.179.248</b>	<b>7.118.845</b>	<b>7.204.616</b>	<b>7.514.000</b>	<b>7.644.000</b>	<b>7.115.042</b>

Komunalno Brčko je u svom zahtjevu za odobravanje tarife za 2020. godinu zatražilo povećanje distributivne mrežarine od 6,97% za sve kategorije kupaca. Operativne i kapitalne troškove djelatnosti distribucije za 2020. godinu, Komunalno Brčko je planiralo u iznosu od 7.644.000 KM, što je za 7,4% više od odobrenog iznosa u prethodnom tarifnom postupku.

Komisija usmjerava svoja razmatranja na sve elemente u troškovnoj strukturi koje je isticao podnosilac zahtjeva, analizu troškova i prihoda izloženu u Izvještaju voditelja postupka, kao i komentare podnosioca zahtjeva podnesene tokom cijelog postupka, te cjelovitom opservacijom odlučuje o podnijetom zahtjevu. Tragom takve obaveze, Komisija izlaže svoja sljedeća stanovišta:

Kod određivanja *troškova materijala*, Komisija prihvata prijedlog voditelja postupka i smatra razumnim odobriti troškove materijala u 2020. godini u visini od 1.230.000 KM, što ujedno predstavlja i procjenu ostvarenja reguliranog subjekta Komunalno Brčko za 2019. godinu.

*Troškovi usluga* su planirani u vrijednosti od 450.000 KM. Značajnije stavke ovog troška odnose se na nabavke usluga održavanja *CRM* i *Billing* softvera, te održavanje SCADA i AMM sistema, što je Komunalno Brčko pobliže obrazložilo u svom odgovoru na javnoj raspravi. Komisija smatra da je iznos ovog troška realan, te ga odobrava u traženom iznosu od 450.000 KM.

Na poziciji *troškova radne snage* za djelatnost distribucije električne energije u 2020. godini, Komunalno Brčko planira iznos od 4.550.000 KM. U odgovoru na pitanje sa javne rasprave, pojašnjeno je da Plan poslovanja za 2020. godinu uključuje popunu svih radnih mjesta prema važećoj sistematizaciji, zadržavanje privremeno zaposlenih do kraja juna 2020. godine, te stimulaciju za radnike Radne jedinice Elektrodistribucija jer je primjećen trend napuštanja kompanije Komunalno Brčko. Smatrajući da pitanje visine troška radne snage prije svega zavisi od broja angažiranih ljudi, odnosno efikasne alokacije administrativnog osoblja koji se povezuju sa poslovima distribucije električnom energijom, Komisija na poziciji troškova radne snage za 2020. godinu odobrava iznos od 4.400.000 KM, što je 2,3% uvećanje u odnosu na odobreno iz prethodnog tarifnog postupka i smatra da se ovim povećanjem ostavlja

dovoljno prostora reguliranom subjektu da planira troškove plata i ostalih primanja zaposlenih u ovoj djelatnosti.

Komunalno Brčko je zatražilo odobrenje *troška amortizacije* za 2020. godinu u iznosu od 900.000 KM, kao rezultat obračuna amortizacije na sredstva koja koristi i sredstva koja planira nabaviti u skladu sa usvojenim Planom nabavki za 2020. godinu, a koji je naknadno dostavljen. U svom komentaru na Izvještaj voditelja postupka, Komunalno Brčko je korigiralo svoj zahtjev na vrijednost 840.932 KM, umanjujući prvobitni zahtjev za iznos amortizacije na donirana sredstva od 59.068 KM. Kao najznačajnije stavke iz Plana nabavki za 2020. godinu, Komunalno Brčko ističe nabavke pametnih brojila i uvođenje AMM sistema u vrijednosti od 460.000 KM, nabavku specijalnih radnih mašina (660.000 KM), te nabavku mjernih transformatora. Planirani radni vijek specijalnih radnih mašina (četiri godine, amortizacijska stopa 25%) Komisija smatra neosnovano umanjenim, te uzimajući u obzir i trajanje tenderskih procedura, odobrava ukupnu sumu troška amortizacije za 2020. godinu u vrijednosti od 857.347 KM, pri tome vodeći računa da je iznos od 59.068 KM amortizacija na donirana sredstva koji se tretira kao odbitna stavka u izračunu potrebnog prihoda za djelatnost distribucije električne energije, kako je prikazano u tabeli 1.

Imajući u vidu da Komunalno Brčko nije detaljnije obrazložilo traženo povećanje *nematerijalnih troškova*, niti je komentiralo prijedlog dat u Izvještaju voditelja postupka, ne može se opravdati zahtijevani iznos na ovoj troškovnoj poziciji, već je razumno odobriti trošak u vrijednosti odobrenog iz 2018. godine, odnosno u iznosu od 263.000 KM.

Povećanje troška grupe *ostali rashodi* Komunalno Brčko je obrazložilo sve češćim zahtjevima za nadoknadu šteta usljed kvarova na uređajima potrošača, naknade šteta nastalih usljed uništenja usjeva i/ili pašnjaka prilikom pristupa ili obavljanja radova na elektroenergetskim objektima, te troškovima sudskih postupka po presudama. Budući da je ovu troškovnu poziciju teško planirati, Komisija smatra da je razumno odobriti iznos od 65.000 KM što je 5.000 KM više od odobrenog iznosa iz predhodnog tarifnog postupka.

*Trošak kamata i ostali finansijski troškovi* se odobravaju u iznosu od 80.000 KM jer će Komunalno Brčko, pored kamata za revolving kredite u 2020. godini koji služe za podršku likvidnosti, imati i obaveze po kamatama za dugoročni kredit, čiju namjenu Komisija smatra opravdanom, imajući u vidu da će kreditna sredstva biti iskorištena za nabavku opreme za obračunsko mjerenje potrošnje električne energije, nabavku trafo stanice, vozila i sl.

Reguliranom subjektu Komunalno Brčko se kao opravdani trošak priznaje i iznos od 70.000 KM po osnovu obaveze plaćanja regulatorne naknade propisane Odlukom o utvrđivanju regulatorne naknade za 2020. godinu ("Službeni glasnik BiH", broj 63/19).

Sagledavajući dostavljenu dokumentaciju i odgovore iznijete na formalnoj raspravi, te naknadno dostavljena obrazloženja vezana za amortizaciju na donirana sredstva, Komisija u potpunosti prihvata argumentaciju voditelja postupka pri određivanju iznosa pojedinih troškova datih u tabeli 1, te odobrava iznos od 7.415.347 KM u svrhu servisiranja operativnih i kapitalnih troškova djelatnosti distribucije za 2020. godinu, vodeći računa da se iznosi od 59.068 KM i 241.237 KM prema Metodologiji tretiraju kao odbitne stavke u izračunu potrebnog prihoda.

U vezi s tim potrebno je imati u vidu da Komunalno Brčko ostvaruje određene prihode po osnovu aktivnosti koje su vezane za djelatnost distribucije električne energije (priključivanje novih kupaca, povećanje priključne snage, izdavanje elektroenergetske saglasnosti, usluge građanima, održavanje javne rasvjete itd.). Projekcija ostalih prihoda po osnovu obavljanja navedenih aktivnosti za 2020. godinu iznosi 716.000 KM. Budući da se usluge održavanja javne rasvjete i usluge građanima u Brčko Distriktu BiH mogu smatrati uslugama koje se

obavljaju na komercijalnoj osnovi, Komisija je odlučila da ukupne operativne i kapitalne troškove distribucije umanjuje za vrijednost od 241.237 KM.

Svi tarifni stavovi donose se u skladu sa Metodologijom za izradu tarifa za usluge distribucije električne energije u Brčko Distriktu BiH (“Službeni glasnik BiH”, br. 89/11 i 90/14).

U cilju određivanja distributivne mrežarine, tj. tarifnih stavova za usluge distribucije električne energije u Brčko Distriktu BiH, pored operativnih i kapitalnih troškova, potrebno je odrediti i ostale troškove koji su sastavni dio ukupnih troškova distributivne djelatnosti (tzv. preneseni troškovi koje čine: *trošak distributivnih gubitaka, troškovi prijenosnog sistema, troškovi rada nezavisnog operatora sistema, te troškovi po osnovu tarife za sistemsku uslugu*).

*Trošak distributivnih gubitaka* električne energije utvrđuje se na osnovu nabavne cijene električne energije koja u sebi ne sadrži prenesene troškove (tarifa za usluge prijenosa, tarifa za rad NOS-a, tarifa za sistemsku uslugu) i odobrene količine električne energije za pokrivanje gubitaka. Kalkulacijska cijena za izračun troška pokrivanja gubitaka u distributivnom sistemu iznosi 8,6643 feninga/kWh, uzimajući u obzir ugovorenu nabavnu cijenu električne energije za 2020. godinu od 10,2874 feninga/kWh, umanjenu za prenesene troškove. U skladu sa Metodologijom, u nadležnosti DERK-a je da odobri procenat gubitaka u distributivnom sistemu. Ostvareni gubici u 2018. godini iznosili su 11,23% od ukupne nabavljene energije, dok su u 2019. godini gubici u iznosili 10,72%. I pored prisutnog trenda smanjenja, distributivni gubici viši su od ostvarenog prosjeka u Bosni i Hercegovini koji iznosi 9,37% za 2018. godinu i 9,20% za 2019. godinu. U cilju smanjenja distributivnih gubitaka i njihovog postepenog svođenja na nivo prosjeka u BiH, a imajući u vidu operativne mjere koje Komunalno Brčko kontinuirano provodi u cilju smanjenja distributivnih gubitaka, trošak ovih gubitaka se odobrava u iznosu 10,5%, odnosno 28.770.000 kWh, što u konačnom iznosi 2.492.719 KM.

*Troškovi prijenosnog sistema* za korisnike distributivnog sistema određeni su na bazi jediničnih cijena od 0,578 feninga/kWh za preuzetu energiju i 1,472 KM/kW za preuzetu snagu iz prijenosnog sistema, imajući u vidu da je planirano preuzimanje 274.000.000 kWh energije i 518.600 kW snage u 2020. godini, što je u apsolutnom iznosu 2.347.099 KM.

*Troškovi rada nezavisnog operatora sistema* na bazi tarife za rad NOS-a koju plaćaju kupci od 0,0563 feninga/kWh i preuzete aktivne električne energije iz prijenosnog sistema iznose 154.262 KM.

*Troškovi po osnovu tarife za sistemsku uslugu* (troškovi obezbjeđenja rezerve snage za sekundarnu i tercijarnu regulaciju i troškovi gubitaka električne energije u prijenosnom sistemu), u skladu sa Odlukom o tarifama za sistemsku i pomoćne usluge (“Službeni glasnik BiH”, broj 8/19, 26/19 i 2/20), obračunavaju se prema jedinstvenoj tarifi od 0,5188 feninga/kWh koja se primjenjuje od 1. januara 2020. godine i iznose 1.421.512 KM.

Ukupan potreban prihod (ukupni troškovi) za izračun tarifa za uslugu distribucije električne energije u Brčko Distriktu BiH iznosi 13.530.634 KM i sastoji se od operativnih i kapitalnih troškova djelatnosti distribucije u iznosu 7.115.042 KM, troškova gubitaka energije u distributivnom sistemu u iznosu 2.492.719 KM i prenesenih troškova (usluge prijenosa električne energije, usluge nezavisnog operatora sistema i sistemske usluge) u iznosu 3.922.873 KM.

Ukupni troškovi distributivnog sistema u Brčko Distriktu BiH se, prema Metodologiji, alociraju na kategorije potrošnje korisnika distributivnog sistema po tarifnim elementima i stavovima. Uzimajući u obzir odobrene troškove za distribuciju električne energije, te aktuelne energetske veličine na području kojim upravlja operator distributivnog sistema Komunalno Brčko, prosječna tarifa za distribuciju električne energije iznosi

5,52 feninga/kWh, što je neznatno manje od prosječne odobrene distributivne cijene u predhodnom periodu, a koja je iznosila 5,57 feninga/kWh.

Imajući u vidu da se tarifni stavovi za distribuciju električne energije već duži vremenski period nisu mijenjali, a u međuvremenu su značajno promijenjene karakteristika potrošnje kupaca na distributivnom nivou, a time i energetske veličine po tarifnim grupama kupaca, Komisija je odlučila prepodesiti tarifne stavove za aktivnu energiju u pojedinim tarifnim grupama kupaca kategorija potrošnje *ostala potrošnja* i *domaćinstva*, pri tome ne mijenjajući prosječne cijene distribucije električne energije u ovim kategorijama potrošnje.

Prema mišljenju Komisije, predloženi tarifni stavovi pružaju realnu osnovu Kompaniji da za djelatnost distribucije električne energije ostvari potreban prihod koji omogućava nesmetano funkcioniranje.

Na osnovu naprijed izloženih stanovišta Komisije, u okvirima njenih diskrecijskih prava da potvrdi reprezentativnost i opravdanost svih podnijetih podataka i tvrdnji, da procjenjuje stepen vjerovatnoće ostvarenja svih prognoziranih troškova i rashoda i da odobrava tarife uvažavajući i konkretne okolnosti u periodu podnošenja zahtjeva za odobrenje tarifa sve do objektivizacije uvjeta za njihovo preciznije određivanje, a koristeći ovlaštenja utvrđena Zakonom o prijenosu da uređuje i pitanja reguliranja distribucije električne energije kupcima na području Brčko Distrikta BiH, Komisija donosi odluku kao u dispozitivu.

DERK će kontinuirano pratiti efekte primjene usvojenih tarifa, zadržavajući pravo podešavanja tarifnih stavova kada ocijeni da je to potrebno.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 04-28-5-391-24/19  
11. marta 2020. godine  
Tuzla

Predsjedavajući Komisije  
Suad Zeljković